

## ALAHADY - TRINITE MASINA - TAONA A



### ***Fa toy izao no nitiavan'Andriamanitra izao tontolo izao***

Ry Kristianina havana, miditra amin'ny vanim-potoana mandavantaona isika manomboka amin'izao Alahady ankalazantsika ny Trinite Masina izao. Miditra amin'ny fiainana andavanandro, miditra amin'ny fampitrahaofana ny fiainana sy ny finoana, tsy mahagaga àry raha taritin'ny Eglizy isika amin'izao Alahady izao hibanjina ny Trinite Masina loharano sy fototra ny fiainantsika manontolo. Taminn'ny Alahady lasa teo Alahadin'ny Pantekôty manambara fa miditra ao anatin'ny fianakaviamben'Andriamanitra isika, olo araiky ao amin'Andriamanitra isika, ka izao Alahady manaraka ny Pantekôty izao no andalinantsika ny finoana mba hivelomantsika ny maha-kristianina antsika vokatry ny batemy ka hahatonga antsika ho Kristy mpiara-belona amin'ny manodidina

antsika, entanin'ny Eglizy isika hibanjina ny fianakaviamben'Andriamanitra, ny Trinite Masina.

Matetika isika milaza fa mystery izany ka sarotra dinihina ny Trinité Andriamanitra tokana olona telo nefa izany no tena midika hoe "olo araiky" ka tsy azo sarahina izy ireo na dia samy manana ny maha-izy azy aza ary dia iray ao aminy na dia samy manana ny toetrany aza. Izany ny Trinite

masina ka ankalazaintsika rehefa tanteraka tokoa ny famonjen'i Kristy. Tsy hoe misaratsaraka izy ireo fa ampibaribarian'izao fety ankalazaintsika izao : rehefa nitsangan-ko velona i Kristy ka niakatra any an-danitra ary naniraka ny Fanahy masina dia tsapantsika àry fa tokana olona telo Andriamanitra, Fianakaviana iray ary ao anatin'ny fahalavorarian'ny fitiavana, izany ny fiadanana nampanantenain'i Kristy raha miseho amintsika izy. Izany koa no entintsika eo amin'ny fiainantsika,

Vakiteny I : Eks. 34: 4b – 6, 8 – 9

Tononkira : Dn. 3: 52, 53, 54, 55, 56

Vakiteny II : 2 Kor. 13: 11 – 13

Evanjely : 3: 16 – 18

tsy hoe mampanonofy antsika ny fandinihana ny Trinite masina izay mystery tokoa fa kosa mampiditra sy maniraka antsika ho Kristy mpiara-belona amin'olona ka hitondra ny fiadanana, ~~ho~~ fahazavana ho an'ny olona, hitondra ny tena fampihavanana marina izay mampangetaheta antsika amin'izao fotoana izao eo anatrehan'ny herisetra na fanilikilihana na eo anivon'ny fianakaviana aza. Marary ny fianakaviana satria tsy maka ny modely tena izy fa ny modelin'izao tontolo izao ny iainany dia ny fampanjakana ny vola, io no heverina atao fandresena. Niova ny fahendren'ny ntaolo malagasy ka "Aleo very tsikalakalam-pihavanana toy izay very tsikalakalam-bola" io no manjaka ankehitriny izay loharano tsy mifototra amin'ny fihavanana.

Ny Trinite masina izay banjinintsika amin'ny alalan'ireo vakiteny telo androany dia manampy antsika haiky fa ny fiombonana no hany fiaianana sy fiadanana, ao amin'ny vakiteny voalohany (*Eks. 34, 4b-6. 8-9*) : Andriamanitra nanambara ny momba azy tamin'i Moizy, rehefa niakatra teny antendrombohitra nivavaka tany dia nambarany tamin'i Moizy fa Izy no Tompo Andriamanitra. Izany no nahatongavan'i Jesoa teto amintsika, ny Ray no Andriamanintsika ary ny Fanahy noraisintsika tamin'ny Batemy no hahafantarantsika fa iray izy telo, mahery io Andriamanitra io, tsy lavitra izy, tsy manapotika na dia manampahefana fa Ray be fitiavana sy famindram-po.

Izany no antitranterin'i Md Paoly (*2 Kor. 13: 11 – 13*) : Noho ny fahasoavan'Andriamanitra sy ny fitiavan'Andriamanitra ary ny firaisana ao amin'ny Fanahy masina dia olo araiky ao amin'Andriamanitra isika. Io no fiarahabana ataon'i Md Paoly mandrakariva anambarany fa ao amin'ny Trinite masina isika ary amin'ny alàlany no iainantsika manontolo ka aoka àry hifampizara hafaliana mandrakariva isika hoy izy.

Manamafy an'izany koa ny Evanjely androany (*Jo. 3, 16-18*) Raha nihaona tamin'i Nikodema i Jesoa dia nampibaribary amintsika fa tsy hitsara antsika no nahatongavany amin'izao tontolo izao fa hanambara fa fitiavana izy ary fitiavana lavorary ka ao aminy sy miaraka aminy ary amin'ny alàlany no hahafahantsika mivelona an'izay tena fitiavana izay ka aoka ho raisintsika ho modely ho antsika mandrakariva ilay fiombonan'ny Trinite Masina. Samy manana ny maha-izy azy izy ireo nefa ao anatin'ny fahasamihafana izany no maha IRAY azy.

Aoka àry isika na dia eo ireny fahasamihafana ireny, na dia eo ireo talenta samihafa aoka ho entina hifanasoavana, ny fahaizantsika mifanasoa ao anatin'ny fahamarinana, fampanjakana ny fampihavanana marina no hahitantsika ny fiombonana tanteraka ary hahitantsika ny fiadanana ka na dia eo aza ny fahalementsika, na dia eo aza izay mety mitranga eo amin'ny fiainantsika aoka hahatsapa isika fa olo araiky ao amin'ny Trinite Masina miaraka amin'Andriamanitra ka afaka mivelona an'izany fitiavana izany ary hiroso mandrakariva amin'ny fanatanterahana ny sitrak'Andriamanitra.

Ry Jesoa Tompo ô, ankalazainay anio ny Trinite Masina, olona telo amy maha Andriamanitra azy sy ny fitiavana mampiray azy, Trinite mampiray ny Ray Zanaka Fanahy masina, enga anie mba ho tafiditra ao anatin'ny fianakaviana ny Trinite masina tokoa izahay ka araky ny asan'ny Fanahy masina ny fahasoavana hoy ianao Jesoa, dia haka tahaka izany Fitiavana izany tokoa izahay, hiray hina bebe kokoa, hiombona amin'ny fahasambarana dieny ety an-tany ka hatramin'ny fiainana mandrakizay. Amen